



Komunikadu Imprensa

13 Setembru 2023

JSMP akompaña Lia-nain uma lisan no estrutura Suku Ogues iha prosesu halo konsultasaun ba revizaun regra Tara-Bandu

Iha 28 no 29 Agostu 2023, Programa Monitorizasaun ba Sistema Judisiáriu (JSMP) akompaña lia-nain husi uma lisan no estrutura suku Ogues iha prosesu halo revizaun regra Tara-Bandu Suku Ogues nian. Iha prosesu revizaun ba regra Tara-Bandu ne'e, JSMP nia papél mak oinsá ajuda aseguara konteúdu husi regra Tara-Bandu ne'e atu nune'e kontribui duni ba situasaun paz no hakmatek iha Suku Ogues, Postu Administrativu Maukatar, Munisípiu Covalima.

Regra Tara-Bandu iha Suku Ogues ba período tinan lima (5) antes ne'e kria iha tinan 2013 ho kondisaun sei halo seremonia hamanas maibé depoisde implementa to'o 2018, estrutura suku tanba iha impedimentu ba orsamentu nune'e la konsege realiza seremonia refere, nune'e inísiu Janeiru 2023 estrutura suku sira hamosu iniciativa hodi hamanas fali Tara-Bandu inklui halo mudansa ba artigu balun ne'ebé maka comunidade ho estrutura suku sira konsidera ladun favorese ba comunidade sira. Iha prosesu revizaun ne'e, estrutura suku sira inklui JSMP hanesan parte ne'ebé sira bele hetan konsellu atu nune'e regra sira ne'e la kontráriu ho prinsípiu jerál iha lei nasionál sira.

Partisipante sira iha prosesu konsultasaun iha loron primeiru hamutuk ema na'in 17 ne'ebé kompostu husi estrutura suku, xefe aldeia, lia-nain no representante veteranu. Enkuantu iha loron segundu partisipante hamutuk ema na'in 23, kompostu husi Xefe Aldeia Soga no Xefi Aldeia Ogues, lia-nain no comunidade.

“JSMP agradese tanba estrutura suku no lia-nain sira iha Suku Ogues hakarak envolve JSMP iha prosesu revizaun ba sira nia regra Tara-Bandu suku nian nune'e bele apár ho lei nasionál sira no mós ida ne'e hanesan parte ida husi serbisu hamutuk ne'ebé JSMP ho Suku Ogues realiza ona iha tinan ida ne'e nia laran,” dehan Sra. Ana Paula Marçal, Diretora Ezekutiva JSMP.

Antes tama ba prosesu revizaun tara-bandu ne'e, JSMP apresenta uluk rezultadu entrevista ne'ebé halo ona ba iha comunidade balun no estrutura suku inklui uma lisan sira kona-ba sira nia hanoin ba iha implementasaun regra Tara-Bandu iha Suku Ogues, ne'ebé realiza desde fulan Marsu to'o fulan Agostu 2023 ba ema hamutuk 22 ne'ebé maioria deklara katak presiza redus sansaun iha regra Tara-Bandu, hamenus kustu kona-ba foti rekursu iha suku laran hanesan fatuk, ai sira ne'ebé uza hodi halo uma inklui rai-henek no habadak tempu sau no koleta ai-han iha suku laran hanesan batar, kulu, nu'u, kami'i, has no kafe.

Depoisde rona tiha JSMP nia apresentasaun ne'e, estrutura suku no lia-nain uma lisan sira rekoñese situasaun sira ne'e sai duni lamentasaun husi comunidade sira durante implementasaun iha regra Tara-Bandu nune'e sira konkorda hodi rekomenda mudansa ba tempu ba sau no koleta. Enkuantu kona-ba sansaun, estrutura suku no lia-nain sira konkorda hodi troka tiha multa fó sala ba malu. Parte seluk, redus mós kustu administrativu hasoru comunidade Suku Ogues kona-ba tula rekursu naturais iha suku laran.

Iha prosesu akompañia revizaun ba regra tara-bandu, maski JSMP hadia buat balun maibé nafatin rona comunidade sira nia opiniaun kona-ba saida mak sira hakarak muda no aumenta iha regra tara-bandu no fó konsiderasaun aas ba iha lisan sira iha suku nian ne'ebé valoriza hakmatek no paz iha comunidade no konsiderasaun ba lei nasionál sira ne'ebé eziste ona.

Sr. Antonio Marçal hanesan Representante Administradór Postu Maukatar, agradese tebes ba JSMP hanesan organizaun ne'ebé halo monitorizasaun ba sistema justisa bele kontribui iha prosesu konsultasaun revizaun ida ne'e nune'e comunidade Suku Ogues bele iha regra Tara-Bandu ne'ebé di'ak no bele uza hodi rezolve disputa sira iha comunidade.

Entretantu Xefi Suku, Sr. Faustino de Araújo iha nia intervensaun, konsidera apoiu husi JSMP ba iha revizaun Regra-Tara bandu hanesan parte ida ne'ebé importante tanba nia rekoñese katak sira menus informasaun kona-ba lei prosesual sira, nune'e dalaruma sansaun ne'ebé regula iha regra Tara-Bandu bele kontradiz fali ho lei nasionál. Nia hatutan, ho JSMP nia apoiu bele ajuda asegura regra hirak ne'e alende bele tulun comunidade sira iha rezolve problema, maibé bele tulun mós estrutura suku sira hodi haree problema ne'ebé mak sira bele rezolve no hakotu no ne'ebé mak sira laiha kompetensia atu hakotu mezmu rezolve ona iha suku.

Tuir planu depoisde konsultasaun ne'e, JSMP ho estrutura suku inklui lia-nain sira sei hasoru malu tan antes finaliza regra Tara-Bandu refere.

Atividade treinamentu no konsultasaun ne'e realiza husi JSMP liuhusi Programa Apoiu Seguransa Komunitariu (PASK), tanba serbisu hamutuk ho The Asia Foundation (TAF) ne'ebé finansia husi Embaixada Nova Zelandia.

Atu hetan informasaun kompletu, favór kontaktu:

Ana Paula Marçal
Diretora Ezekutiva JSMP
Email: ana@jsmp.tl
Telefóne: 3323883/7704073